

Акафист

Пресвятой Богородице в честь иконы Ея «Боголюбской» (Боголюбивой)

Празднование 19 августа/ 1 сентября

Кондак 1

Взбранной Воеводе, Боголюбивей Царице, превысшей всякаго создания, Деве и Матери Христа Бога, похвальная восписуем ти раби Твои, Богородице! Ты же, яко боголюбивая и всемилостивая Мати, благоизволившая явити пресветлый Свой лик благоверному нашему князю Андрею, от бед и скорбей сохрани ны и храм сей, да зовем Ти:

Радуйся, Боголюбивая Царице Богородице, надеждо и прибежище наше.

Икос 1

Ангелов превысшую вся небесныя силы величают Тя, Богородицу Царицу, мы же грешнии на земли, чудному Божию о Тебе смотрению дивящися, всею душею, сердцем и устнами дерзаем глаголати:

Радуйся, благословенная в женах Дево благодатная; радуйся, Всевышняго Мати, Духа Святаго пребывание. Радуйся, Царице небесе и земли и всех небесных сил высшая; радуйся, Ангелы чтимая, от Серафим воспеваемая. Радуйся, благословляемая на Небеси и славимая на земли; радуйся воистинну присноблаженная и пренепорочная.

Радуйся, Боголюбивая Царице Богородице, надеждо и прибежище наше.

Кондак 2

Видящи премилосердная Матерь Божия земное скорбное житие наше, немощи и болезни, благоизволи явити чудо, избравши сосуд благодати и милостей Своих к нам, благочестиваго князя Андрея. Обаче и мы с радостию несказанною припадаем к Тебе, Владычице, и из глубины души благодарим Тя, нашу дивную заступницу, воспевающе Богу: Аллилуия.

Икос 2

Разумети хотя чудо, явленное милостию Твоею, Пресвятая Богородице, егда кони, везши святой образ, сташа и людие к шествию подвигнути их не возмогоша, благоверный князь Андрей начат со слезами молитися к Тебе, Владычице, да покажеш, Пречистая, волю святую Свою, Ты же в видении благоволила еси открыти преблагий совет Твой. Темже и мы, чудо сие воспоминающе, преклоньше колена, взываем сие:

Радуйся, прославившая место обители Твоея дивным чудодействием и в сем милость преизобильную нам показавшая; радуйся, страну Владимирскую светом Своим озарившая и лучи света на всех нас простирающая. Радуйся, всеблагая наша наставнице, любовью нас привлекающая; радуйся, охранительнице наша от бед и болезней. Радуйся, у Господа спасения нашего ходатаице, Царице наша Небесная; радуйся, за вся благодеяния Твоя благодарению нас научающая.

Радуйся, Боголюбивая Царице Богородице, надеждо и прибежище наше.

Кондак 3

Сила Вышняго осеняет всех, с верою и благоговением притекающих к Тебе, Пречистая Госпоже Богородице, и уповающих на Твою милость, понеже всякое благое прошение приемлещи тепле. Благоверный князь моляше Тя, Владычице, явити волю Твою, преисполнився трепета пред таинством Твоего о нем произволения. Такожде и мы к Тебе, Пречистая, прибегаем, умиленно вопиюще: всемилостивая покровительнице наша, научи и нас прославляти всечестное и всехвальное имя Твое и достойно воспевати Богу: Аллилуия.

Икос 3

Имеяй на пути, яко Боготечную звезду, честный образ Твой, Владычице, благоверный князь в прилежней молитве своей пред чудотворною Твоею иконою сподобися яве узрети Тя, Царицу Небесную, и теплое ходатайство Твое Богу приносящую о месте явления Твоего и о всем мире. О, Божия Мати, Пречистая Богородице! Со умилением припадаем к Тебе и, богатая Твоя милости ожидающе, умильно вопием Ти:

Радуйся, радости наша и крепкая заступнице; радуйся, покрове наш и наше утешение. Радуйся, охранительнице наша и наше упование; радуйся, отрадо наша и дивное о нас попечение. Радуйся, похвало наша, чудесы нас удивляющая; радуйся, прибежище наше и залог вечнаго спасения.

Радуйся, Боголюбивая Царице Богородице, надеждо и прибежище наше.

Кондак 4

Недоумеваает ум наш, како достойно есть восхвалити Тя и дивное явление Твое, Пресвятая Владычице: яко солнце лучи испущающи, предстала еси молящемуся князю и тако рекла еси: «Не хочу, да образ Мой несещи в Ростов, но во Владимире постави Его: на сем месте во Имя Моего рождества церковь воздвигни и обиталище иноком состави», и, воздевши Свои Божественней руце ко Владычному образу, скрыся от духовных очес его. Преклоняем и мы колена пред Тобою, Боголюбивая Мати, и Твоя чудная явления и веления разумеюще, из глубины души воспеваем Богу: Аллилуия.

Икос 4

Слыша Господь моления Твоя, Богоизбранная Царице Небесная, обеща выну исполняти, яко Преплагия Матере, прошения Твоя. Ты же, о Владычице, тогда рекла еси ко Господу усты Своими: «Владыко многомилостиве, Господи, Иисусе Христе, Сыне и Боже Мой, молю Тя, да пребудет Божественная благодать на людех Твоих, и светозарный луч славы Твоея да нисходит всегда на место сие, Мною избранное». Истинно исповедуем, о Пречистая, яко скоро помогаеши с верою к Тебе прибегающим и, со умилением воспевающе Тебе, зовем сие:

Радуйся, молитвеннице наша пред Господем и Сыном Твоим; радуйся, заступнице всего рода человеческого и защитнице народа православнаго. Радуйся, Матернюю любовь Твою всегда нам являющая и вся благая нам дарующая; радуйся, радости нам, благодати же и славы вечная ходатаице, дивная наша утешительнице. Радуйся,

бытие обители и ниспослание на ню благодати предвозвестившая; радуйся, в память Твоего явления храм во славу Рождества Твоего устроить указавшая и тамо Церкви Христовой дивное украшение явившая.

Радуйся, Боголюбивая Царице Богородице, надеждо и прибежище наше.

Кондак 5

Яко лучезарную звезду, в пределах Владимирских явленную, узре князь Андрей пресветлый образ Твой, Владычице, и в явлении сем уразумеи знамение велия попечения Божия о месте явления Твоего, даде ему имя Боголюбивое. О Царице и Владычице! Освети и нас светом Твоим Небесным, сохраняющи нас под кровом Твоим благим, услыши всеумиленные молитвы восхваляющих Тя и воспевающих Богу: Аллилуия.

Икос 5

Видение чудное Богоматере и святая словеса Ея приемля с радостным трепетом, благоверный князь умиленно со слезами паде на землю и сладостно возблагодари Всевышняго, яко сподобися узрети Тя, Пресвятую Богородицу. Посем ускори церковь заложити, идеже ныне Боголюбивая обитель, именем Твоим красующися, молится за весь мир пред пречистым Твоим образом. Созерцающе в таковом событии знамение благодати, дерзаем воспевати сице:

Радуйся, милостивая, яко устроила еси тихое пристанище ищущим спасения; радуйся, пресветлая, яко свет подаваеши всем хотящим жити в преподобии, и тем показуеши правыя стези к

Царствию Небесному. Радуйся, Теплая ходатаице о живущих в обителях Твоих, милость Свою выну им обещавшая; радуйся, яко в трудах иноческих им всегда помогаеши и к трудолюбию подвизаеши. Радуйся, яко в келлиях монашеских на молитву вразумляеши и к добродетельному житию ревностно возбуждаеши; радуйся, хранительнице дивная обителей святых, яко Твоею благодатною силою оныя зиждятся и преспевают в благочестии.

Радуйся, Боголюбивая Царице Богородице, надеждо и прибежище наше.

Кондак 6

Проповедует вся земля Российская богатая милости Твоя, Владычице, и дивное благодатное князя Андрея вразумление. Сему последуя, благоверный князь повеле образ написати тем подобием, якоже ему явися Пречистая, и, обрет святую икону, поклонися, радостно со слезами благодаря Бога и скорую нашу Помощницу, взывая: Аллилуия.

Икос 6

Возсия благодать неизреченная от цельбоносных иконы Твоея, Пресвятая и Боголюбивая Мати. Слышим и видим величие чудес, от нея бываемое, со удивлением взираем на сию икону, яко на пресветлое лице Самой Пречистой Девы. О Госпоже, Царице и Владычице! Ты выну воздвизаеши руце Твои на моление за нас пред Сыном Твоим, не презри и вопиющих Ти похвальная сия:

Радуйся, во утешение нам даровавшая образ Твой чудотворный; радуйся, новую милость и новую благодать сим в Церкви являющая и тем путь спасения показующая. Радуйся, покровительнице

наша, от бед нас спасающая и в скорбех быстрое облегчение нам посылающая; радуйся, сострадательнейшая к болезням нашим, скорую помощь нам подающая.

Радуйся, Боголюбивая Царице Богородице, надеждо и прибежище наше.

Кондак 7

Хотя благоверный князь достойно почтити пресвятую волю Твою, Владычице, собора архиереи, священники и людей множество, да ублажат Тя хвалебно собором. О, чуднаго торжества! О, премудрости судеб Твоих, Владычице! Преславно преносится чудотворная Твоя икона в дивный храм всечестнаго Рождества Твоего. Чудодействием прославляется церковь Твоя, о Госпоже Богородице, и вси предстоящие, радости и умиления исполнении, преклоньше колена, лобызают Твой пречистый образ и зывают: О, Мати Боголюбивая, осени всесильною Твоею десницею и нас, воспевающих Богу: Аллилуия.

Икос 7

Дивна дела Твоя, Владычице! Все людие, здравии и болящие, богатии и нищие, вси прибегаем к Тебе, сострадательнейшей Матери нашей. Не отрини нас от лица Твоего, буди милостива к нам, недостойным рабом Твоим, во всех путех жизни нашея, защити и помилуй от всея души любовью вопиющих Тебе таковая:

Радуйся, ненадеющихся надеяние и печальных утешение; радуйся, о скорбящих попечение и бедствующим помощи. Радуйся, алчущих кормительнице и нищих одеяние; радуйся, убогих заступнице и болящих исцеление. Радуйся, старцев

покровительнице и юных воспитательнице; радуйся, враждующих примирение и обидимых защитнице.

Радуйся, Боголюбивая Царице Богородице, надеждо и прибежище наше.

Кондак 8

Дивное чудо пренесения преславных иконы Твоея, Владычице, торжественно вси чествуем и на всякое лето в сей светлый праздник благодарно воспоминаем вся неизчетная благодеяния чудес, Тобою, Пречистая, от иконы дивно источаемых; и тебе, угодниче Божий Леонтие, в помощь призываем, чтуще с любовью честную память твою, да молитвами твоими сподобимся у Пречистыя обрести благодать, еще же непрестанно воспевати Господу. Аллилуия.

Икос 8

Все величие чудес Твоих, Пречистая, несть исчислити возможно, егда безбожный царь Батый, разоряя грады и веси и храмы сожигая, со мною ратию приблизися и ко святей обители Твоей, Пречистая, вниде в церковь и, обрет чудотворную икону, дерзостно положи руку на драгия ризы. Храм со всем богатством огню предаде, точию един образ Твой, Владычице, цел обретесе и ничимже поврежден бысть. О, велие чудо! О, коль дивны знамения благодати являеши нам, Пречистая! Кто не ублажит Тя? Кто не воспет Твоя славная чудеса? И мы, грешнии, со умилением взирающе на святую икону Твою, толь чудесно от погибельнаго пламене сохранившуюся, со слезами взываем сице:

Радуйся, яко купина, огнем горевшая и неопальна пребывшая; радуйся, яко благодать Тебе дадеся силу

огненную угашати. Радуйся, в годину напастей и испытаний оставившая нам святую икону Свою во утешение; радуйся, яко благостынею Своею угашаеши в нас огонь нечестия пламенем огня Божественнаго. Радуйся, прославившая чудесы икону Твою; радуйся, яко молитвою и лобызанием иконы Твоея вси мы приемлем благодатное утешение.

Радуйся, Боголюбивая Царице Богородице, надеждо и прибежище наше.

Кондак 9

Все упование возлагаем на Твою благость, Пресвятая Владычице! Милосердию Твоему несть конца, величие же Твое кто исповесть? Предстоящи с мольбою у престола Всевышняго, коль многое множество чудес являла еси нам, Пречистая, коль дивно спасла еси славный град Москву от грозного врага Тамерлана, коль чудно объят его великий страх пришествием Твоим в мать русских градов и понуди абие отступить со всем воинством. Не умолчим никогда, Заступнице наша преславная, о всех Твоих благодеяниях, да не будет под спудом свет чудес Твоих, и ныне, предстояще пред пречистым Твоим образом и молящися умиленною душею и сокрушенным сердцем, взываем Богу: Аллилуия.

Икос 9

Ветии многовещаннии не довлеют по достоянию воспети хвалу и благодарение Пречистей, како царственный град сохрани от татарских полчищ. Егда вся рать вражия отступаше от предел Московских, царь Иоанн со скорбию и слезами

отпусти чудотворный образ Твой, Боголюбивая Владычице, в избранную обитель Твою, идеже со умилением и радостью неизреченною сретоша его людие, и от мала до велика, вси, преклоньше колена, ублажаху Тя, Пречистая. И мы сея радости мысленно причащающесея, Царице Небесней вопием благодарне:

Радуйся, премилосердая утешительнице наша, святую икону дати нам изволившая; радуйся, от нашествия врагов иноплеменных нас дивно спасающая. Радуйся, царей наших несокрушимый щите, радуйся, отечества нашего благонадежное утверждение. Радуйся, воинства, крепкая защита, от меча вражия сохраняющая; радуйся, от разорения, плена и лютыя смерти святою десницею Твоею всех уповающих на Тя избавляющая.

Радуйся, Боголюбивая Царице Богородице, надеждо и прибежище наше.

Кондак 10

Спасти хотя свою душу, благочестивый царь Феодор, любовь Божию разжигаем, добре подвижася, пребывая в посте и в молитве, и, вельми любяще Боголюбивую обитель, часто ю посещаше: единожды же с теплою молитвою пред чудотворною Твоею иконою, Боголюбивая Мати, от усердия своего в дар Тебе принесе носимый на персех своих честный крест, камнями драгими украшенный. Взирающе на сие дивное украшение иконы Твоея, о Пречистая, радуемсе вси духовно о сем, како Тя, Царицу и Владычицу, славят и чтут вси вернии, и молящесея вопием Богу: Аллилуия.

Икос 10

Стена, ограждающая ны от всяких болезней, бываеши, Пресвятая Богородице, егда со умиленною молитвою призываем в помощь нашу Твое Матернее милосердие. Аще бо Ты не бы предстояла, Боголюбивая Мати, молящи о нас, кто бы нас избавил от смертоносных ран и язв всегубительных! Со умилением созерцаем, како на пути благодатнаго шествия Твоего вси болящии чудесно исцеляхуся и струпы на телесех во мгновение ока врачевахуся. Темже и мы, припадающе к цельбоносней иконе Твоей, молим Тя, Владычице: не остави ны милостию Твоею пребогатою, избави ны от всяких болезней, наипаче же от смертоносныя язвы и пагубы. О Пресвятая Богородице! Благопоспешно спаси нас и помилуй с верою и любовью вопиющих Ти из глубины души:

Радуйся, страны нашея православныя дивная покровительнице, многажды от бед и напастей ю избавлявшая; радуйся, страдальцев благодатным утешением венчающая и расслабленным скорое восстановление дающая. Радуйся, слепым прозрение и хромым от недуга их дивное избавление даровавшая; радуйся, пораженных различными недугами и болезнями чудесно исцеляющая. Радуйся, скорбящих родителей в лишении чад их утешающая благодатною Твоею помощию; радуйся, целительнице наша в страданиях телесных и благая утешительнице в печалех наших душевных.

Радуйся, Боголюбивая Царице Богородице, надеждо и прибежище наше.

Кондак 11

Пение благодарственное всеумиленно приносит Тебе, Боголюбивая Мати, вся страна Российская за чудное избавление от смертоносных язв, толь губельно ю поразивших. Светлии дние дивных исцелений начертани в сердцах верующих, и моления теплая возносятся на всякое лето в память сего радостнаго торжества, егда святая икона Твоя, Владычице, с пении духовными приносится в славный град Владимир. Красуйся и ликуй, благословенный граде! Торжествуйте, правовернии, зряще несомую икону Владычицы, источающую неисчетныя исцеления всем притекающим к ней с верою и любовью! Преклоняем и мы колена пред Тобою, Пресвятая Богородице, величаем Тя и молим: приими милостивно и от нас жертву хвалы и прославления, приносимую Тебе от недостойных раб Твоих, вопиющих Богу: Аллилуия.

Икос 11

Светозарную икону Твою, Боголюбивая Мати, с благоговением зрим в Божественных храмах Твоих, радуящися. Кто не прибегае к Тебе, Владычице? Кто не покланяеся, кто не лобызаше Твоя пречистыя стопы? Кто не умолял Тя, Заступницу нашу? О Пресвятая Дево, приими веру и усердие наше, направи путь наш на стези истины, умоли Господа и Сына Твоего, да спасет нас, имиже вестъ судьбами, да не погибнем в нераскаянии о наших грехопадениях, и услыши моления к Тебе взывающих:

Радуйся, Благодатная, всеми добродетельми преукрашенная, Своею благодатию нас не оставляющая; радуйся, хранительнице наша, в час

смертный тьму вражию отгоняющая и по смерти нас упокоевающая. Радуйся, милостивая, милость Свою нам являющая в день испытания, вонже откроются дела наша, добрая же и злая; радуйся, милосердая, заступление нам посылающая и тем в будущем вечныя радости сподобляющая.

Радуйся, Боголюбивая Царице Богородице, надеждо и прибежище наше.

Кондак 12

Благодатию Божественною осеняема, святаго Иоанна Предтечу с лики Архангел зрим стоящия окрест Пречистыя Матере Боголюбивыя: вкупе же ублажаем и Тя, угодниче Божий, помози нам, немощным, имети веру непоколебиму, ум чист, силы и произволение освящати души наша постом и молитвою и выну полагати хранение устом нашим, да молитвами Владычицы и твоими сподобимся достойно воспети Богу нашему: Аллилуия.

Икос 12

Поюще неисчетная знамения и чудеса Твоя, Пресвятая Богородице, умиленно припадаем к пречистому образу Твоему, Боголюбивая Мати лобызающе его со страхом и трепетом, хвалим Тя яко неисчерпаемый источник благодати и молим: буди ходатаица о нас, воздвигни руке к Сыну Твоему, да выну в жизни сей и в будущей милосердие Его неотступно будет с нами, взывающими Тебе:

Радуйся, присноблаженная, паче земнородных ведущая блаженство пребывати с Богом; радуйся, и нас причастники сего блаженства соделывающая. Радуйся, Пренепорочная Дево, всецело стяжавшая чистоту, смирение и непорочность; радуйся,

дарующая нам благая сия, да будем угодны Тебе и Богу. Радуйся, Всемиловитая Царице, простирающая на нас, грешных, милость Свою во всякое время живота нашего; радуйся, чадолюбивая Мати, дарующая нам Свое Матернее заступление в час смерти.

Радуйся, Боголюбивая Царице Богородице, надеждо и прибежище наше.

Кондак 13

О Мати Боголюбивая, Царице Небесная, всемогущая наша предстательнице! Малья сия услышавши смиренныя мольбы наша, призри на ны милостивым Твоим оком; буди нам скорая заступница в день кончины нашея и в час смертный явися нам Сама, Пречистая, простирающи руку помощи, отгоняющи духов злобы, ищущих поглотити душу нашу при разлучении от тела, и сподоби нас в будущей жизни в веселии и радовании возвеличити и прославити Тя, яко преблагую покровительницу нашу, да спасеннии Тобою в бесконечней веце вопием Богу: Аллилуия.

(Этот кондак читается трижды, затем 1-й икос и 1-й кондак)

Икос 1

Ангелов превысшую вся небесныя силы величают Тя, Богородицу Царицу, мы же грешнии на земли, чудному Божию о Тебе смотрению дивящися, всею душею, сердцем и устнами дерзаем глаголати:

Радуйся, благословенная в женах Дево благодатная; радуйся, Всевышняго Мати, Духа Святаго пребывание. Радуйся, Царице небесе и земли и всех небесных сил высшая; радуйся, Ангелы чтимая, от Серафим воспеваемая. Радуйся, благословляемая на Небеси и славимая на земли; радуйся воистинну присноблаженная и пренепорочная.

Радуйся, Боголюбивая Царице Богородице,
надеждо и прибежище наше.

Кондак 1

Взбранной Воеводе, Боголюбивей Царице,
превысшей всякаго создания, Деве и Матери Христа
Бога, похвальная восписуем ти раби Твои,
Богородице! Ты же, яко боголюбивая и
всемиловитая Мати, благоизволившая явити
пресветлый Свой лик благоверному нашему князю
Андрею, от бед и скорбей сохрани ны и храм сей, да
зовем Ти:

Радуйся, Боголюбивая Царице Богородице,
надеждо и прибежище наше.

Молитва первая

О Пречистая Госпоже Богородице, Мати
Боголюбивая, надеждо нашего спасения! Возри
милостивно на предстоящая с верою и любовью и
поклоняющияся пречистому образу Твоему; прими
наше хвалебное пение сие и пролей теплую Твою
молитву о нас, грешных, ко Господу, да, презрев вся
наша согрешения, спасет и помилует нас. О
предивная Владычице! Покажи на нас чудныя
милости Твоя. Молим Тя умиленно, избави нас от
всякия скорби, настави на путь всякия добродетели
и благостныни, спаси от искушений, бед и болезней,
изми от нас оклеветания и ссоры, сохрани от
молниеноснаго грома, от запаления огненнаго, от
глада, труса, потопа и смертоносныя язвы, подай
нам Свою милостивную помощь на пути, в мори и на
суше, да не погибнем люте. О всемиловитая,
Боголюбивая Мати, с твердым упованием возсылаем
к Тебе нашу смиренную молитву! Не отрини наших

слез и воздыханий, не забуди нас во вся дни живота нашего, но всегда пребывай с нами и Твоим заступлением и ходатайством у Господа подаждь нам отраду, утешение, защиту и помощь, да выну славим и величаем преблагословенное и всепетое имя Твое. Аминь.

Молитва вторая

О чудная и высшая всех тварей Царице Богородице, Небеснаго Царя Христа Бога нашего Мати! Услыши нас, грешных и недостойных раб Твоих, в час сей молящихся и припадающих к Тебе с воздыханием и слезами и умильно глаголющих: изведи нас от рова страстей, Владычице; избави нас от всякия скорби и печали; огради от всякия напасти и злых клевет, от несправедного и лютаго навета вражия. Можеши бо, о Благодатная Мати наша, не точию от всякаго зла сохранить люди Твоя, но и всяким благодеянием снабдити и спасти; разве Тебе иныя предстательницы в бедах и обстояниях и теплыя ходатаицы о нас, грешных, не имамы к Сыну Твоему, Христу Богу нашему, Егоже умоли, Владычице, да спасеннии Тобою, славим и в будущем веце всесвятое имя Сына Твоего и Бога нашего, купно со Отцем и Святым Духом, ныне и в бесконечныя веки. Аминь.